

Sakshandsamar:

Lars Erik Lunde
E-post: lars.erik.lunde@sfj.no
Tlf.: 57638102

Vår ref.

Sak nr.: 16/1563-13
Gje alltid opp vår ref. ved kontakt

Internt l.nr.

29585/18

Dykkar ref.**Dato**

LEIKANGER, 05.06.2018

Notat**Frå:** Fylkesrådmannen**Til:** Fylkesutvalet, møte 11. juni**Ferjelem på Skorpa i Flora kommune**

Fylkesrådmannen vil i dette notatet gi ei orientering om status for prosessen med Flora kommune for å finne ei løysing knytt til ferjelem på Skorpa. Fylkesutvalet bør vurdere vidare prosess for denne saka.

I finansutvalet si behandling av sak 4/16 Budsjett/økonomiplan 2017-2020 den 28.09.2016 vart det gjort vedtak om følgjande oppfølgingspunkt (pkt. 4.2):

Finansutvalet ber fylkesrådmannen gå i dialog med Flora kommune for å finne ei løysing knytt til ferjelem på Skorpa.

Det har etter dette vore dialog med kommunen om saka. Det har frå fylkeskommunen si side vore signalisert eit ønskje om finne ei samla løysing som inneber å omklassifisere fylkesvegen på øya til kommunal veg, og at dette vert kopla til eit fylkeskommunalt bidrag til ferjelem. I dag er det ei blanding av fylkesveg (fv. 553), kommunal veg og privat veg på Skorpa. Fylkesvegen er om lag 2 km lang. Både vegens trafikk og funksjon tilseier at dette bør vere ein kommunal veg.

I følgje Flora kommune bur det 15 menneske på øya.

Etter veglova § 7 kan fylkeskommunen, etter at kommunen har uttalt seg, gjere vedtak om at fylkesveg skal leggjast ned eller gjerast om til kommunal veg. Dette kan i utgangspunktet ikkje settast i verk utan at vegen oppfyller tekniske krav etter nærare retningslinjer. Tidlegare har vi vorte samde med ein annan kommune (Gulen) om at dei vederlagsfritt kan overta ansvar for ein fylkesveg som ein del av ein avtale om finansieringsbidrag til eit nytt anlegg. Dette vart gjort i samband med at fylkeskommunen ytte tilskot til ny veg til Skipavika.

Vi har så langt ikkje kome fram til ei omforeint løysing på den her aktuelle saka.

Den 24.5.2018 søkte Flora kommune likevel om eit bidrag på 3,5 mill. kr til å finansiere utbygging av ferjelem på øya Skorpa. Kommunen har i følgje søknaden innhenta eit anbod på 7,0 mill. kr (inkl. mva.) og er klare til ein rask oppstart av prosjektet.

Flora kommune laga i mai-17 ein tilstandsrapport for fv. 553. Denne har m.a. taksert ei utbetring av vegen til omlag 3,7 mill. kr ekskl. mva. Kommunen har også innhenta eit overslag på årlege driftskostnader på om lag 0,3 mill. kr.

Statens vegvesen opplyser at det i dag vert nytta om lag 0,1 mil. kr per år til drift/vedlikehald av vegen.

Etter at fylkeskommunen fekk nemnde søknad, har det på nytt vore drøfta med kommunen om det er aktuelt med overtaking av vegen slik den ligg i dag, mot eit visst vederlag.

Fylkesrådmannen har vore innstilt på å tilrå ei løysing med kommunen som inneber eit tilskott på inntil 3,5 mill. kr til ferjelem (tilsvarande om lag 60 pst. av kostnad etter mva.-refusjon), under føresetnad at kommunen overtek ansvaret for fv. 533 vederlagsfritt.

Kommunen har signalisert at dei ikkje ønskjer å ta over vegen på slike vilkår og særleg ikkje dersom fylkeskommunen legg til grunn at det skal skje vederlagsfritt. Kommunen har ut frå fylkesrådmannen sitt framlegg til løysing foreslått at fylkeskommunen dekkjer inntil 2,5 mill. kr av kostnaden til ferjelem og at fv. 533 framleis skal vere fylkesveg. Vidare foreslår kommunen at innsparinga frå redusert tilskott kan nyttast til vidare drift av vegen.

Fylkesrådmannen legg ut frå vedtaket i finansutvalet frå 28.09.2016 til grunn at det er politisk vilje til å gi eit visst økonomisk bidrag til Flora kommunen til å realisere ein ferjelem på Skorpa. Fylkesrådmannen sitt utgangspunkt er at dersom vi skal prioritere fylkeskommunale midlar til dette prosjektet, bør det også stillast krav til kommunen. Fylkesrådmannen meiner eit rimeleg krav er at kommunen overtek fylkesvegen på Skorpa.

Eg ser såleis ikkje at denne saka har ei løysing som både kommunen og fylkesrådmannen kan tilrå. Fylkesrådmannen ber derfor fylkesutvalet vurdere kva som skal gjerast vidare i saka.

Alternativa er slik fylkesrådmannen ser det at søknaden frå kommunen vert avvist eller at FU ber fylkesrådmannen vurdere søknaden i tråd med fylkeskommunen sine rutinar om finansiell medverknad i den ordinære budsjettprosessen for budsjett 2019.